

Na osnovu člana 2., 8. i 13. Zakona o principima lokalne samouprave u Federaciji Bosne i Hercegovine ("Službene novine FBiH" broj 49/06, 51/09), člana 55. i 104. Statuta općine Ilijaš – prečišćeni tekst ("Službene novine Kantona Sarajevo" broj 20/09) i člana 99. Poslovnika o radu Općinskog vijeća Ilijaš ("Službene novine Kantona Sarajevo" broj 2/10 i 18/15), Općinsko vijeće Ilijaš na svojoj 15 sjednici održanoj dana 28.12.2017. godine donijelo je

**ODLUKU
O NAČINU OZNAČAVANJA I EVIDENTIRANJA NASELJENIH MJESTA, POSLOVNIH
ZONA, ULICA, TRGOVA I KUĆNIH BROJEVA**

DIO PRVI – UVODNE ODREDBE

Član 1.

(Predmet regulisanja)

Ovom Odlukom uređuje se način označavanja naziva naseljenih mjesta, poslovnih zona, ulica i trgova, način utvrđivanja kućnih brojeva, način označavanja zgrada i građevinskih parcela kućnim brojevima, kao i vođenje registra naselja, poslovnih zona, ulica, trgova i kućnih brojeva.

Član 2.

(Nadležnost nad provođenjem Odluke)

1. Označavanje naziva naseljenih mjesta, poslovnih zona, ulica i trgova, utvrđivanje kućnih brojeva, označavanje zgrada i građevinskih parcela kućnim brojevima i vođenje registra kućnih brojeva, ulica, trgova i naseljenih mjesta iz člana 1. ove Odluke obavlja služba nadležna za geodetske poslove i katastar jedinice lokalne samouprave (u daljem tekstu: Služba).

2. Nadzor nad radom Službe vrši Federalna uprava za geodetske i imovinsko-pravne poslove koja je za potrebe izrade registra jedinici lokalne samouprave besplatno ustupila aplikaciju za elektronsko vođenje registra dok će jedinica lokalne samouprave Federalnoj upravi za geodetske i imovinsko-pravne poslove ustupiti podatke u svrhu vođenja jedinstvenog Adresnog registra za područje Federacije Bosne i Hercegovine.

Član 3.

(Upotreba jezika i pisma)

Nazivi naseljenih mjesta, poslovnih zona, ulica i trgova ispisuju se velikim latiničnim slovima, s tim da se nazivi naseljenih mjesta i poslovnih zona ispisuju velikim, a naziv ulice na tablici sa kućnim brojem ispisuju se malim latiničnim slovima.

DIO DRUGI – NAČIN OZNAČAVANJA NAZIVA NASELJENIH MJESTA I NASELJA

Član.4.

(Označavanje naseljenog mjesta)

Naseljeno mjesto označava se pločom s nazivom naseljenog mjesta. Pločom s nazivom naseljenog mjesta smatra se saobraćajni znak "naziv naseljenog mjesta" koji se izrađuje i postavlja prema posebnom propisu o saobraćajnim znakovima.

Član 5.

(Označavanje naseljenog mjesta na lokalnim i nekategorisanim cestama)

Na lokalnim i nekategorisanim cestama, naseljeno mjesto označava se pločom od trajnog materijala na kojoj je ispisan naziv naseljenog mjesta, veličine ne manje od 60 x 40 cm,

postavljenoj na posebnim stubovima, s desne strane ceste, na ulazu u građevinsko područje naseljenog mjesta.

Član 6.

(Način označavanja naselja)

Na označavanje naselja, koja predstavljaju izgrađen, nastanjen, prostorno i funkcionalno objedinjen dio naseljenog mjesta, sukcesivno se primjenjuju odredbe članova 4. i 5. ove Odluke, a označavanje se vrši temeljem Plana podjele na naselja kojeg donosi predstavničko tijelo jedinice lokalne samouprave.

DIO TREĆI – NAČIN OZNAČAVANJA NAZIVA ULICA I TRGOVA

Član 7.

(Obaveza dodjeljivanja naziva ulicama i trgovima)

1. Nazivi ulica i trgova dodjeljuju se u naseljenim mjestima koja imaju više od 2000 stanovnika.
2. Iznimno od odredbi stava 1. ovog člana nazivi ulica i trgova mogu se dodijeliti i u naseljenim mjestima manjim od 2000 stanovnika ako tako odluči predstavničko tijelo jedinice lokalne samouprave.

Član 8.

(Dodjeljivanje naziva ulicama i trgovima)

„Plan podjele na ulice i trgove“ koji se izrađuje na temelju Baze podataka katastra nekretnina (u daljnjem tekstu: BPKN), a predstavlja grafički prikaz podjele naseljenog mjesta na ulice i trgove, osnova je za imenovanje ulica i trgova i sastavni dio akta o njihovom imenovanju.

Član 9.

(Izmjena naziva ulice i trga)

1. Kada predstavničko tijelo jedinice lokalne samouprave utvrdi ili izmjeni naziv ulice ili trga, dužno je o tome obavijestiti Službu, u roku od 30 dana od dana utvrđivanja, odnosno izmjene naziva ulice ili trga.
2. O izvršenoj promjeni naziva Služba će u skladu sa članom 27. ove Odluke pokrenuti aktivnosti i izvršiti označavanje ulice i trga u roku od 30 dana od dana prijema te obavijesti.

Član 10.

(Označavanje ulica i trgova)

1. Označavanje naziva ulica i trgova vrši se postavljanjem tabli od trajnog materijala, minimalnih dimenzija 50 x 30 cm, sa ispisanim imenom ulice, odnosno trga, tako da se:
 - a) u svakoj ulici, na početku i na kraju ulice, te na svakom značajnijem raskršću s obje strane postave table,
 - b) na svakom trgu na mjestima spajanja ulica s trgom, na desnu stranu izlaska ulice na trg postave table.
2. Ploča s nazivom ulice ili trga postavlja se na zgrade po mogućnosti na visini 2,5 metra od tla.
3. Ako na mjestu gdje je potrebno ploču postaviti nema zgrade, ako je zgrada zaklonjena ili udaljena od trotoara tako da natpis na ploči nije uočljiv, ploča s nazivom ulice ili trga postavlja se na zaseban nosač (stub, okvir i sl.) minimalne visine 2,5 metra.
4. Detaljni izgled table za označavanje ulica i trgova prikazan je u Grafičkom prilogu broj 1. koji je sastavni dio ove Odluke.

DIO ČETVRTI – NAČIN OZNAČAVANJA NAZIVA POSLOVNIH ZONA

Član 11. (Označavanje poslovne zone)

1. Označavanje poslovne zone vrši se postavljanjem tabli od trajnog materijala, minimalnih dimenzija 60 x 40 cm, sa ispisanim nazivom poslovne zone.
2. Naziv poslovne zone treba da bude ispisanim velikim štampanim slovima.
3. Ploča sa nazivom poslovne zone postavlja se na posebnim stubovima, s desne strane saobraćajnice, na ulazu u područje poslove zone.
4. Detaljan izgled table za označavanje poslovne zone prikazan je u Grafičkom prilogu broj 2. koji je sastavni dio ove Odluke.

DIO PETI – NAČIN UTVRĐIVANJA KUĆNIH BROJEVA I OZNAČAVANJA ZGRADA I GRAĐEVINSKIH PARCELA KUĆNIM BROJEVIMA

Član 12. (Načela utvrđivanja kućnih brojeva)

1. Kućni broj utvrđuje se za sve stambene i poslovne zgrade, građevinske parcele, kao i privremene objekte izgrađene ili postavljene u skladu sa propisima o planiranju i gradnji.
2. Pod stambenom zgradom, u smislu ove Odluke, podrazumijeva se zgrada u kojoj se stalno ili privremeno stanuje.
3. Pod zgradom u kojoj se privremeno stanuje, u smislu ove Odluke podrazumijeva se vikendica, ljetnikovac, baraka i druga zgrada u kojoj se stanuje samo u sezoni.
4. Pod poslovnom zgradom, u smislu ove Odluke, podrazumijeva se svaka zgrada namijenjena za obavljanje privrednih, prosvjetnih, zdravstvenih, socijalnih, kulturnih, upravnih i drugih djelatnosti, kao i za smještaj i čuvanje materijalnih dobara.
5. Pod građevinskom parcelom, u smislu ove Odluke, podrazumijeva se najmanji dio prostora koji je urbanističkim planom namijenjen za izgradnju i koji obuhvata jednu ili više katastarskih parcela ili njenih dijelova.

Član 13. (Zgrade za poljoprivredne svrhe)

1. Za zgrade koje služe u poljoprivredne svrhe (silosi, štale i slično), ne utvrđuje se kućni broj u skladu sa članom 11. ove Odluke, osim ako u njima postoji stan namijenjen za stalno ili privremeno stanovanje.
2. Ako se zgrade iz stava 1. ove Odluke nalaze na posebnoj građevinskoj parceli utvrđuje se kućni broj te građevinske parcele.

Član 14. (Utvrdjivanje kućnih brojeva u naseljenom mjestu)

1. Utvrđivanje i označavanje kućnih brojeva vrši se posebno za svako naseljeno mjesto.
2. Utvrđivanje i označavanje kućnih brojeva vrši se posebno za svaku ulicu u naseljenom mjestu, pri čemu zgrade, odnosno građevinske parcele s lijeve strane ulice, odakle počinje utvrđivanje, dobivaju neparne kućne brojeve, počevši od broja jedan, a zgrade, odnosno građevinske parcele s desne strane ulice, parne brojeve, počevši od broja dva.
3. Utvrđivanje i označavanje kućnih brojeva u svakoj ulici vrši se s kraja ulice koji je bliži glavnom dijelu, odnosno centru naseljenog mjesta i nastavlja u pravcu periferije.
4. U naseljenim mjestima ili dijelovima naseljenih mjesta smještenim pretežno uz jednu cestu, označavanje zgrada brojevima u ulici na toj cesti počinje i teče u smjeru oznake

kilometara, a ako smjer označavanja kilometara nije utvrđen, označavanje zgrada brojevima počinje od kraja koji je bliži glavnoj cesti.

Član 15.

(Posebna pravila za utvrđivanje kućnih brojeva)

1. Za dvije ili više zgrada u istoj ulici ne može se utvrditi isti kućni broj.
2. Ako zgrada ima više ulaza neposredno vezanih za ulicu, svakom ulazu utvrđuje se poseban kućni broj.
3. Ako utvrđivanje dodatnog kućnog broja za ulaz u zgradu izaziva potrebu promjene ostalih kućnih brojeva na zgradama, za sve ulaze u zgradu utvrdit će se isti kućni broj kome se dodaju slovne oznake po abecednom redu, počevši od slova A.
4. Za dvorišne zgrade utvrđuje se kućni broj ulične zgrade kome se dodaje slovna oznaka po abecednom redu, a ako ulična zgrada ima više ulaza s kućnim brojem utvrđenim slovnim oznakama, dvorišnoj zgradi se utvrđuje kućni broj ulične zgrade s narednom slovnom oznakom.

Član 16.

(Utvrđivanje kućnih brojeva na trgu)

Utvrđivanje kućnih brojeva na trgu vrši se u kontinuitetu u smjeru kretanja kazaljke na satu, počevši od ugla glavne ulice i od broja jedan.

Član 17.

(Utvrđivanje kućnih brojeva za zgrade izgrađene na jednoj strani ulice)

Zgrade izgrađene samo jednom stranom ulice, ukoliko drugom stranom izgradnja nije moguća ili nije predviđena (ulice uz obalu i sl.), označavaju se uzastopnim brojevima od broja jedan na više.

Član 18.

(Utvrđivanje kućnih brojeva u naseljenim mjestima koja nisu podijeljena na ulice i trgove i naseljima)

1. U naseljenim mjestima, koja nisu podijeljena na ulice i trgove i naseljima kućni brojevi se utvrđuju uzastopnim brojevima od jedan na više i to onim redom koji je najpogodniji za najkraći, odnosno najprirodniji prijelaz od broja do broja.
2. Ako se naseljeno mjesto, odnosno naselje iz stava 1. ovoga člana nalazi uz cestu, zgrade se označavaju brojevima prema članu 12. stavu 2., 3. i 4. ove Odluke.

Član 19.

(Utvrđivanje kućnih brojeva u naseljenim mjestima koja nisu podijeljena na ulice i trgove i naseljima koja su sastavljena iz više dijelova)

U naseljenim mjestima koja nisu podijeljena na ulice i trgove i naseljima koja su sastavljena iz više dijelova, kućni brojevi se utvrđuju prema članu 18. ove Odluke najprije u jednom dijelu, a zatim nastavljaju brojevima u drugom i tako redom do posljednjeg dijela tog naseljenog mjesta onim redom, koji je najpogodniji za najkraći odnosno najprirodniji prijelaz od jednog do drugog dijela naseljenog mjesta.

Član 20

(Utvrđivanje kućnog broja za novoizgrađenu zgradu)

Zgradi sagrađenoj između dvije postojeće zgrade poslije izvršenog utvrđivanja kućnih brojeva, utvrđuje se kućni broj prve susjedne zgrade manjeg kućnog broja, kome se dodaje slovna oznaka po abecednom redu.

Član 21

(Utvrdjivanje kućnog broja za građevinsku parcelu)

1. Za građevinske parcele koje imaju izlaz na dvije ili više ulica, može se utvrditi samo jedan kućni broj.
2. Ako se građevinska parcela kojoj je već utvrđen kućni broj cijepa, prvi cijepani dio do susjedne zgrade nižeg kućnog broja zadržat će ranije utvrđeni kućni broj, a za ostale dijelove utvrđuje se isti kućni broj sa slovnim oznakom po abecednom redu, u zavisnosti od broja cijepanih dijelova.

Član 22.

(Uvjerenje o utvrđivanju kućnog broja)

Služba određuje i potvrđuje kućni broj Uvjerenjem. Uvjerenje kojim se određuje kućni broj, pored općih podataka sadrži i oznaku katastarske čestice na kojoj je zgrada sagrađena, odnosno na kojoj se nalazi građevinska parcela.

Član 23.

(Označavanje kućnih brojeva)

1. Pločica s kućnim brojem postavlja se na zgradu tako da je vidljiva s ulice odnosno javne ili druge ceste od koje se pristupa zgradi i to desno od ulaza, neposredno iznad ulaza ili na dijelu zgrade koji je bliži ulazu.
2. Označavanje građevinskih parcela kućnim brojevima vrši se postavljanjem pločice na posebnom stubu visine 2,5 m u lijevom uglu parcele od glavne ulice, odnosno puta, ako je parcela ograđena postavljanje table vrši se na ulazu parcele vodeći računa o njenoj vidljivosti.
3. Pločica s kućnim brojem iz stava 1. i 2. ovog člana izrađuje se od trajnog materijala minimalnih dimenzija 20x15 centimetara u boji jednakoj boji ploča kojima su označene ulice i trгови u tom naseljenom mjestu.
4. U naseljenim mjestima koja nisu podijeljena na ulice i trgove, na pločici ispod broja zgrade ispisuje se naziv naseljenog mjesta, a boja pločice jednaka je boji ploča kojima su u naseljenim mjestima na području jedinice lokalne samouprave označeni nazivi ulica i trgova.
5. Detaljan izgled pločice s kućnim brojem prikazan je u Grafičkom prilogu broj 3. koji je sastavni dio ove Odluke.

Član 24.

(Rok za postavljanje kućnog broja)

Općinska služba iz člana 27. ove Odluke dužno je označiti zgrade, građevinske parcele i privremene objekte kućnim brojevima u roku od 15 dana od dana izdavanja Uvjerenja iz stava 1. člana 22. ove Odluke.

Član 25.

(Postupanje sa srušenim zgradama)

Služba će ukinuti kućni broj zgradi koja je srušena. Ukinuti broj zgrade može se odrediti novosagrađenoj zgradi ako se uklapa u način označavanja zgrada utvrđen ovom Odlukom.

Član 26.

(Uslovi za promjenu kućnog broja)

1. Kućni broj će se promijeniti:
 - a) ako zgrada ili građevinska parcela promijeni pripadnost ulici ili trgu,
 - b) ako dođe do spajanja ili razdvajanja ulica odnosno trgova,
 - c) ako dođe do podjele naseljenog mjesta na ulice i trgove,

- d) ako to nalažu promjene nastale u područjima naseljenih mjesta.
2. Uvjerenje kojim se evidentira i potvrđuje promjena kućnog broja sadrži i dosadašnji kućni broj, novi kućni broj zgrade, te oznaku katastarske čestice na kojoj je zgrada sagrađena.

DIO ŠESTI – OSTALE ODREDBE O OZNAČAVANJU NASELJENIH MJESTA, ULICA, TRGOVA, ZGRADA I GRAĐEVINSKIH PARCELA

Član 27.

(Nabavka i postavljanje ploča i pločica s nazivima i kućnim brojevima)

Nabavku i postavljanje tabla s nazivima naseljenih mjesta, poslovnih zona, ulica i trgova kućnim brojevima vrši jedinica lokalne samouprave putem Službe civilne zaštite.

Član 28.

(Troškovi označavanja)

Troškove označavanja naseljenih mjesta, ulica i trgova nazivima (nabavka i postavljanje tabli) i troškove održavanja tabli kao i troškove označavanja zgrada i građevinskih parcela kućnim brojevima (nabavka i postavljanje tabli) snosi jedinica lokalne samouprave.

Član 29.

(Obaveze vlasnika, investitora, korisnika)

1. Vlasnik, odnosno investitor nove zgrade ili privremenog objekta, kao i vlasnik, odnosno korisnik građevinske parcele dužan je:

- a) omogućiti da se tabla ulice ili trga, odnosno tablica s kućnim brojem postavi na njegovom objektu, odnosno na njegovoj građevinskoj parceli;
- b) održavati čistom tablicu s kućnim brojem i brinuti se da kućni broj bude vidljiv i čitak;
- c) obavijesti Službu o oštećenju ili uništenju tablice s kućnim brojem, u roku od 30 dana od dana nastanka oštećenja ili uništenja.

2. Vlasnik, investitor, odnosno korisnik iz stava 1. ovog člana dužan je, u cilju evidentiranja promjena, prijaviti Službi sve promjene koje se odnose na izgradnju novog, odnosno rušenje postojećeg objekta ili cijepanje parcele, u roku od 30 dana od dana nastanka promjene.

Član 30.

(Prijava izgradnje, kupovine objekta, građevinske parcele)

1. Vlasnik, odnosno investitor nove zgrade ili privremenog objekta dužan je, u roku od 30 dana od dana podnošenja prijave početka izvođenja radova, odnosno podnošenja prijave za postavljanje privremenog objekta u smislu propisa o planiranju i gradnji, podnijeti zahtjev za utvrđivanje kućnog broja i označavanje zgrade ili privremenog objekta kućnim brojem.

2. Vlasnik, odnosno korisnik građevinske parcele dužan je, u roku od 30 dana od dana sticanja prava vlasništva, odnosno prava korištenja na građevinskoj parceli, podnijeti zahtjev za utvrđivanje kućnog broja i označavanje građevinske parcele kućnim brojem.

Član 31.

(Zabrana neovlaštenog označavanja i skidanja)

Zabranjeno je neovlašteno označavanje, skidanje, oštećivanje i narušavanje izgleda tablica s kućnim brojevima i tabla s nazivima naseljenih mjesta, poslovnih zona, ulica i trgova.

DIO ŠESTI - REGISTAR PROSTORNIH JEDINICA

Član 32.

(Registar prostornih jedinica)

1. Registar prostornih jedinica je evidencija naseljenih mjesta, poslovnih zona, ulica, trgova i kućnih brojeva na teritoriju jedinice lokalne samouprave.
2. Registar prostornih jedinica vodi se kao sastavni dio BPKN u skladu sa modelom podataka katastra nekretnina i ovom Odlukom.

Član 33.

(Vođenje registra prostornih jedinica)

Registar prostornih jedinica za teritorij jedinice lokalne samouprave vodi i održava Služba.

Član 34.

(Kaznene odredbe)

1. Novčanom kaznom od 200. do 1000. KM kaznit će se za prekršaj vlasnik, odnosno investitor nove zgrade ili privremenog objekta, vlasnik, odnosno korisnik građevinske parcele ili korisnik poslovnog prostora, ako:
 - a) ne omogući da se tabla s nazivima ulica i trgova, odnosno tablica s kućnim brojem postavi na njegovom objektu, odnosno građevinskoj parceli (član 29. stav 1. tačka a.);
 - b) ne održava čistom tablicu s kućnim brojem i ne brine se o vidljivosti i čitkosti kućnog broja (član 29. stav 1. tačka b.);
 - c) u propisanom roku ne obavijesti Službu o oštećenju ili uništenju tablice s kućnim brojem (član 29. stav 1. tačka c.);
 - d) u propisanom roku ne prijavi sve promjene koje se odnose na izgradnju novog, odnosno rušenje postojećeg objekta ili cijepanje parcele (član 29. stav 2.);
 - e) u propisanom roku ne podnese zahtjev za utvrđivanje i označavanje kućnog broja za novoizgrađenu zgradu ili privremeni objekt, odnosno građevinsku parcelu (član 29. stav 1. i 2.);
 - f) neovlašteno označava ili skida tablice s kućnim brojevima ili table s nazivima naseljenih mjesta, ulica i trgova (član 31.).
2. Novčanom kaznom od 50 do 200 KM kaznit će se za prekršaj iz stava 1. ovog člana i odgovorna osoba u pravnoj osobi.
3. Novčanom kaznom iz stava 1. ovog člana kaznit će se za prekršaj i osoba koja neovlašteno označava, skida, oštećuje ili narušava izgled tablice s kućnim brojevima ili table s nazivima naseljenih mjesta, ulica i trgova (član 31.).

DIO OSMI – PRELAZNE I ZAVRŠNE ODREDBE

Član 35.

(Postupanje s postojećim kućnim brojevima)

1. Zgrade označene brojevima po dosadašnjim propisima zadržavaju svoje brojeve, osim u slučajevima iz člana 26. ove Odluke.
2. Brojevi zgrada određeni prema dosadašnjim propisima mogu se promijeniti radi usklađivanja načina označavanja zgrada brojevima s odredbama ove Odluke, ako je označavanjem zgrada u znatnoj mjeri otežana orijentacija odnosno snalaženje po brojevima zgrade u naselju, ulici odnosno trgu.

Član 36.

(Započeti postupci utvrđivanja kućnih brojeva)

Postupci za utvrđivanje kućnih brojeva koji nisu završeni do dana stupanja na snagu ove Odluke, okončat će se u skladu sa odredbama ove Odluke.

Član 37.

(Osiguranje uslova za digitalno vođenje Registra prostornih jedinica)

Jedinica za lokalnu samoupravu je dužna osigurati uslove za digitalno vođenje Registra prostornih jedinica na razini jedinice lokalne samouprave u roku od 12 mjeseci od dana stupanja na snagu ove Odluke.

Član 38.

(Stupanje na snagu)

Ova Odluka stupa na snagu osmog dana od dana objave u „Službenim novinama Kantona Sarajevo“).


Broj: 01/1-02-_____/17
Ilijaš, 28.12.2017. godine

P R E D S J E D A V A J U Ć I
Općinskog vijeća Ilijaš

Mahir Dević, prof., s.r.

Grafički prilog br.1

IZGLED TABLE SA NAZIVOM ULICE I TRGA



Grafički prilog br.2

IZGLED TABLE SA NAZIVOM INDUSTRIJSKE ZONE



Grafički prilog br.3

IZGLED PLOČICE SA KUĆNIM BROJEM

